

الفاجومي

يوم أذاعوا خبر سينا بصوت نجاة

«يوم ٧ يونيو كتبت قصيدة «واه يا عبد الودود»
 كرد فعل تلقائي.
 « دوامه لفتنا كلنا.. رعب قلق يا ترى يا هل ترى.
 «انعقد مجلسنا في المساء وغنينا حتى الصباح» نوح
 النواح والنواحه».

obekikan.com

دوامه مرعبه لفتنا كلنا... دوامه من الرعب والقلق يا ترى يا هلترى.. الناس في الشوارع والقهاوى والأتوبيسات مبلمين.. ما حدش قادر يبص في وش التانى.. الضحكه المصريه الصافيه الجريئه ماتت.

زكى كمسارى أتوبيس ٩٥.. المشاكس خفيف الدم ركبت معاه يوم ٧ يونيو لقيته ساكت وحاطط وشه في خشبه التذاكر وبيأخذ الفلوس من الركاب ما بيبصش فيها زى عوايده ويشاغب مع الركاب..

زكى ده كان متعه بالنسبه لركاب خط ٩٥.. آخر طرفاته كانت قبل الحرب بيومين مع مواطن قروى راكب ومعاه قفه، قعد زكى يحسس عليها وبعدين قال له:
- إيه ده؟.. المشلتت ممنوع في مصر.

الراجل قال له:

- ومين اللي منعه؟

قال له:

- بلاش كلام في السياسه لنروح أنا وأنت في أبو نكله.

زكى النهارده حزين ومبلم.. سألته من باب كسر الصمت.

- مالك يا أبو الزيك؟

بص لى ما قدرتش أحط عيني في عينه... نزلت وشى في الأرض تانى.. وصلت المنظمه لقيت نفس الحاله.. ما حدش بيتكلم مع حد.. ما حدش يبص لحد، الناس خايفه من بعضها.. عايز أتكلم مع حد عايز أفضفض. دخلت مكتب فاضى ووقلت على نفسى بالفتاح من جوا وبدأت أكتب:

واه يا عبد الودود

يا رابض ع الحدود
ومحافظ ع النظام
كيفك ياواد صحيح
عسى الله تكون مليح
وراجب للأمام
أمك ع تدعى ليك
وع تسلم عليك
وتجول بعد السلام
خليك ددع لابوك
ليجولوا منين دايبوك
ويمصخوا الكلام
واه يا عبد الودود
ع اجولك وأنت خابر
كل الجضيه عاد
ولسه دم خيِّك
ماشرباش التراب
حسك عينك تزحزح
يدك عن الزناد
خليك يا عبده راصد
لساعه الحساب

آن الأوان يا ولدي

ماعدًا إلا الميعاد

تتفض الشركة واصل

وينزحوا الكلاب

إن كُت ودد أبوك

تديب لي تار أخوك

والأهل يبلغوك

دميعةً السلام

●●●

واه يا عبد الودود

كيفك وكيف زمايلك

عسى الله طيبين

خالك زناتي داي لك

ضمن المتطوعين

واختك تطلع يوماتي

ع المستشفى الجديد

حاكم عيمرنوها

في العرکه تكون حكيمه

ومحمدین موافی

یتعلم المطافی

ويجولك شد عزمك

ويجولك العوافى

ومن هنا الجرايب

والعيله والعيال

ع يبلغوك سلامهم

ولتمه الرجال

وآخر الكلام

نجولك فى الختام

الله يصون بلدنا

ويحرس السلام

والدك حسن محارب

غفير برج الحمام

يوم الخميس الحزين تمانيه يونيو سنه ١٩٦٧

اليوم دا بيّفكرنى بموال قديم سمعته مره من عيد السروجى زميلى فى عمال

الكنال بتوع السكه الحديد تبع الزقازيق... الموال القديم بيقول:

يوم التلات الذى

فات

صعب ياخواتى

فى حى بلبيس

عساكر جيش

لمنع الناس

عن النحاس ياخواتي

البطل أحمد سعيد بطل زعيق وتهديد وغلب صوت العقل وبدأ يقول كلام مفهوم.. وأتارى إسرائيل دى بقى طلعت ماعندهاش ريحه الشرف ولا هى ولا أمريكا... وإن الولس هو اللي هزم عرابي!!

البيانات العسكريه جزاها الله كل خير طمنتنا وبردت قلوبنا ع الفرقة الرابعه المدرعه وإنها سليمه والحمد لله، كما خط دفاعنا الثانى ما زال متماسك بعون الله!!
والظاهر والله أعلم إن البوينه تبع المارشات العسكريه عطلت ولأحاجه فقاموا مشكورين مركبين بوينه تانيه يقوم على بختنا يطلع ع البوينه التانيه أغنيه:

كل شيء راح وانقضى

واللى بينا خلاص مضى

ما تفهمش مين هو اللي بينا ومضى عليه إيه؟

أنا بودانى اللي حياكلها الدود سمعت الغنوه دى فى اليوم المذكور ثلاث مرات وعلى موجه البرنامج العام فقط لاغير!

باقول ممكن تكون الحكايه صدفه! عموماً إن بعض الظن إثم... هى صدفه برضه أما صباح اليوم الحزين فكان شكلها زى المنقذ اللي انطفت ناره بكوز ميه فبقى معجنه.. ما نشنتات عجيبه ما تعرفش ولاد الحرام كانوا بيحببوا منين... وقف ضخ النفط.. نطف ضخ الوقف وحاجات من هذا القبيل شرطاً بالخبر الأحمر.. إيه رأيك بقى؟ وآخر الليل ما هانش عليهم يسبوا فينا بصايه والعه راحوا دالقين على دماغنا الخبر الشوم- مصر تقبل وقف إطلاق النار- انطفينا يا ولداه وانطفينا وكفيننا ع الخبر خمسه وأربعين مليون ماجور.

آخر نهار الخميس الحزين خدت نسخه من قصيده عبد الودود ورحت على دار أخبار اليوم عشان ينشروها فى مجله آخر ساعه اللي كان رئيس مجلس إدارتها

يوسف السباعي برضه كان لازم القصيده دى توصل لصاحبها عبد الودود المصرى
اللى هو زكى كمسارى ٩٥ وسمنطر زميل النقل الميكانيكى وشاعر الشرايين وأحمد
سليم عامل التراجيل الشيوعى وأبوك على الشموخ والأستاذ محمد زى العسل...
كل اللى بيغنوا نسيوه تصورا! مع إنه هو اللى عليه الركب فى الحرب والسلام.

ودخلت مكتب مدير مكتب يوسف بيه لقيت اتنين أفنديه قاعدين على مكتب
وكراسيهم لازقه فى بعض وساكتين وأول ما شافونى داخل بصوا لبعض قلت لهم:

- سلامو عليك.

ما حدش رد.

قدمت الورقه لواحد منهم فبدأ يقرأ بصوت مسموع.

واه يا عبد الودود.

يارابض ع الحدود.

قال لى:

ما خلاص ما بقاش فيه حدود.

رحت مطلع قلم من جيبي وشاطب المطلع وكاتبه كده:

واه يا عبد المتعال

يارابض ع الكنال

بصوا لبعض بدهشه وقال لى واحد منهم:

- يوسف بيه جوا خش إديله القصيده... وبصوا لبعض وضحكوا.

دخلت المكتب الأعظم لقيت يوسف بيه فى منتهى الأناقه لابس قميص رمش
العين أزرق فاتح بياقه فانها وزن وبنطلون رمادى فانله وجزمه بنوش إنجليزى
عريض وشراب رمادى نايلون حتقولى شفت الجزمه والشراب إزاي؟ لأنه كان قاعد
ع الكرسى وممدد رجليه ع المكتب فى وش الداخلى من بره وماسك التليفون اللبنى

وبيهمس وعنيه الجميله مبتسمه زى أجدرع وأجمل شجيع سيما أمريكاني.. ساعه
ماشافنى اتعدل فى قعدته ناولته القصيده وقلت له:

- انشر دى.

خدها منى وقال لى:

- حاضر حنشرها العدد الجاى.

نزلت من أخبار اليوم زى اللى مضروب على دماغى بدل ما اتجه لشارع فؤاد
اتجهت لميدان رمسيس من شارع الجلاء عند مستشفى السكه الحديد لقيتهم راميين
المرضى على الرصيف وعريبات جيش واقفه قدام المستشفى بينزلوا منها جثث
وجرحى وشفّت كيس مشمع مليون ما أعرف إيه وغرقان بقع دم من برا ما أعرفش
إزاي وصلت حوش آدم دخلت الحمام حسيت بإسهال شديد كأنه ميه سخنه مدبت
إيدى بابص فيها لقيتها غرقانه دم أحمر جيت أقوم ماقدرتش ندهت على محمد
على جه خدنى من الحمام نيمنى ع الدكه الخشب ما أعرفش نمت قد إيه صحيت على
صوت إمام قال لى:

- سلامتک.. نجيب لك الدكتور عبد الفتاح؟

قلت له:

- ماتيجى نتمشى.

قال لى:

- بينا.

نزلنا من حوش آدم دخلنا الغوريه شمال على بوابه المتولى وتحت بوابه المتولى
قلت له:

- هنا بالضبط كان متعلق جثمان طومانباى.

قال لى:

- رحمه الله عليه.

قلت له:

- رحمه الله علينا إحناء.. إحناء دلوقتي اللي نستحق الرحمة يا إمام.. وخرجنا من بوابه المتولى يمين على تحت الربع خلصناه وعودنا يمين على بورسعيد ويمين على الأزهر ويمين على الغوريه وشمال على حوش آدم وصلنا البيت كانت انكتبت واتلحنت أول قصايد الرد على الهزيمه ليلتها جه سعد الموجي ووجيه القاياتي ومنير سويلم وجمال الموجي وغيرهم وفضلنا نغنى حتى مطلع الفجر.

ناح النواح والنواحه

حاحا

على بقره حاحا النطاحه

حاحا

والبقره حلوب

حاحا

تحلب قنطار

حاحا

لكن مسلوب

حاحا

من أهل الدار

حاحا

والدار بصحاب

حاحا

وحدا شر باب

حاحا

غير السرايدب

حاحا

وجحور الديق

حاحا

ويبيان الدار

حاحا

واقفين زنهار

حاحا

وف يوم معلوم

حاحا

عملوها الروم

حاحا

زقوا الترياس

حاحا

هربوا الحراس

حاحا	دخلوا الخواجات
حاحا	شفظوا اللبناات
حاحا	والبقرة تنادى
حاحا	وتقول ياولادى
حاحا	وولاد الشوم
حاحا	رايحين فى النوم
حاحا	البقرة انقهرت
حاحا	فى القهر انصهرت
حاحا	طب وقعت ليه؟
حاحا	وقعت م الخوف
حاحا	والخوف يجى ليه؟
حاحا	من عدم الشوف
حاحا	وقعت م الجوع ومن الراحه
حاحا	البقرة السمرا النظاحه
حاحا	ناحت مواويل النواحه
	على حاحا
	وعلى بقره حاحا
	ملحوظه:

لتنين الصحفيين اللى كانوا فى مكتب مدير مكتب يوسف بيه مازالوا أحياء وربنا يديهم الصحه والعمر وهما الأستاذ طارق فوده والأستاذ أحمد صالح.



